

COMUNE DI BOARA PISANI
BIBLIOTECA COMUNALE
"MAESTRO FERRARI"
C.F.C. ATHESES



in
diaeto
veneto 97



~~*linea*~~

**BIBLIOTECA COMUNALE
"LIVIO FERRARI"
BOARA PISANI (PD)
C.F.C. ATHEISIS**

con il patrocinio:

COMUNE DI BOARA PISANI PD



**CONCORSO DI POESIA
RISERVATO AGLI ALUNNI
DELLA SCUOLA DELL'OBBLIGO
E AGLI ADULTI
DELLE PROVINCE DI PADOVA E ROVIGO**

PRESENTAZIONE

Proponiamo questa ulteriore edizione del concorso dedicato alla memoria del compianto M° Livio Ferrari, soddisfatti per la buona partecipazione sia dei bambini che degli adulti.

Dopo più di un decennio la manifestazione ha trovato un proprio spazio nell'attività di molti poeti della provincia di Padova e di Rovigo.

Forti di questa considerazione, l'anno prossimo, contiamo di estendere il premio anche ad altre provincie, forse a livello regionale.

E' uno sforzo nella direzione di far riflettere il più possibile sulla nostra cultura che, inserita in un contesto più generale, ci può continuamente far scoprire un legame che a volte sembra perdersi nella corsa frenetica del vivere quotidiano.

Sempre per riconfermare l'attenzione verso il nostro territorio, la Biblioteca Comunale di Boara Pisani parteciperà alla realizzazione di un volume, edito in occasione del ventennale del CFC Athesis, che riporterà la nostra parlata e varie foto del territorio. La diffusione della pubblicazione è prevista per dicembre 1997. L'appuntamento per il concorso "In Diaeto Veneto" è invece confermato per l'anno prossimo.

Graziano Zanin

(pres. Comitato di Gestione)

Renato Boato

(Assessore P.I.)

SCUOLA ELEMENTARE

CLASSI PRIME

LA RABIA

*Marco xé rabià,
el xé tuto rosso infogonà,
el ciapa a pelà la so cartela,
con che la colpa che la gà ela...
El spinze tuti par passare,
cussi calchedum el fà cascare.*

RICCARDO COSELLA
*Classe Prima Scuola Elementare
Boara Pisani (PD)*

LA ELISA LA XE' CONTENTA

*Onquò a xé el so compleano,
la me amiga Elisa la xé contenta.
I so oci slusega come do perle,
la so boca la ride
e le so masele le xé rose
cofà du pumi.
La pensa zà ai doni
che la gavarà onquò...*

PAVIERA FEDERICA
*Classe Prima Scuola Elementare
Boara Pisani (PD)*

LA ME AMICA CRISTINA

*La me amiga Cristina
la xé na bela putina,
la ga el naso a patatina,
le manine le xé ciciote
bele, grase la le bate forte.
Co la me vede, la ride asè
la xé contenta come on re.*

NALE ENRICO
*Classe Prima Scuola Elementare
Boara Pisani (PD)*

PASIN, PASETO

*Pasin, paseto
a casco zò dal leto
me salvo sol tapeto
me grato la zuca
me sento na gnoca.
A coro da me mama
che la me cuna
e la me basa
la me coerze
co la so sotana.*

MIRCO PASQUALIN
*Classe Prima Scuola Elementare
Boara Pisani (PD)*

CLASSI SECONDE

I PUTINI CROATI

*Diese dì fa in tea me scuo
xè vegnù i putini croati
e noaltri ghemo fatto na festa.
Ghemo cantà e sventoà e bandiere,
dopo ghemo fatto dee foto.
Dopo i putini croati i ne gà saudà
e i putini dea nostra scuo i xè' ndà dentro.
Mi e i me compagni semo' ndà in classe
e ghavemo preparà ea cartea,
intanto i putini croati i xè' ndà in mensa.*

CLASSI SECONDE
Scuola Elementare
Anguillara Veneta PD

SUI COLLI

*Sto ano scolastico el sta par finire:
el xè sta beo anca parchè
semo 'nda a fare on viaio soi coli.
Quando jerimo su in alto
se vedeva e case come tante scatoete,
pareva che con on deo se tocasse el ceo.
Semo 'nda nel bosco in mezo ai pini
e piante e fiori;
se sentiva el fischiato dei oseleti
e l'aria che me vegneva doso
saveva de on profumo de natura:
xè sta BEO.*

CLASSI SECONDE
Scuola Elementare
Anguillara Veneta PD

MI E LA VEDELA DE ME NONO

*Mi na olta so 'nda in stala
co na botiglia piena de acqua.
So 'nda vizin a la vedela
ca me so afesionà
ghe go versà l'acqua sol muso
e ela la ga tirà fora la lengua par bevare
e mi par sbaglio ghe go butà l' acqua soe snarise .
Dopo la vedea
la se ga messo la butiglia in bocca
e la ga bevù.
Dopo ghe go fato na carea e so'nda via.*

CLASSI SECONDE
Scuola Elementare
Anguillara Veneta PD

NA JORNATA DE SOE

*In te na bea Jornada de soe
jero drio corare so on prà
e dopo me go sentà soea riva del Gorzon.
A sentivo cantare i oseiti,
el vento me despetenava
e le api le ronzava in tel cieo blu.
Sentivo el fruscio del'erba,
el gato chel miagolava
e el dolse sciacquio
dele onde del fiume.
A me sentivo ben e in pace.*

CLASSI SECONDE
Scuola Elementare
Anguillara Veneta PD

CLASSI TERZE

LA BISSA

*La bissa xè longa
e la strissa.
Ga la lengua biforcuta
ma però la xè muta.
Sa tea vedi comparire
xè meio scomparire.
La bissa ghe someia a on baston
ma guai se la te da on morsegon.
La xè longa e la strissa,
la xè la bissa.*

MARTINA SIVIERO
*Classe III Scuola Elementare
Anguillara Veneta PD*

LA GELTRUDE

*La Geltrude la stà da me nona Romana.
La xè bianca e paciocona
e tanto canterina
che co la taca no la ghea mola più.
El dì die Palme
nona Romana la se gà racomandà:
“Senti Geltrude,
par la domenega che vegnarà
se te vuoi che na bona Pasqua sia,
almeno na dozina me ne servaria!
Prova a dirghio ae to amighe,
fame un piasere
e senti cosa che le dise”.*

*La Geltrude, che la xè na vecia ciacolona,
ma de animo gentile,
le sue amighe tute, la gà radunà
e, in do e do quatro (giorni),
no una, ma do adiritura
iera e dozine de ovi
che de rosso vivo
me nona Romana la gà impiturà.
E indovina, cara Paolina,
de chi el iera l’ovo rosso pì duro
che tuti i altri el gà batù? !
No non ghe xè gnente da dire:
la Geltrude e le sò amighe
le xè die vere profesioniste,
die signore GALINE !*

DAVIDE BACCAGLINI
Classe III Scuola Elementare
Anguillara Veneta PD

PENSIERI

*In marzo xè rivà la primavera
ai primi de maio xè rivà e rondini,
e zola de qua e de là
ma el caldo
non xè gnancora rivà.*

*Na rondine xè rivà
con el peto bianco tuto dorà
con el cuore generoso
la me ga portà felicità.*

SAMUEL BREDA
*Classe III Scuola Elementare
Anguillara Veneta PD*

FINALMENTE

*Finalmente te si arivà
rondinea libera
e leziera
malgrado el vento
ch'el te porta indrio,
mi te speto col fià sospeso.*

IACOPO FORMENTIN
*Classe III Scuola Elementare
Anguillara Veneta PD*

LA RONDINEA

*Corpeto bianco, coletto rosso tunica nera.
E' la rondinea che me dise ca xè rivà primavera.
La riva tuta nera e abronzata
la me sibila visin
e la me dise che l'invernata
la xè pasata.
La vien qua da noialtri a lavorare.
"Cari a go la me casa da rifare!"
E tera e acqua
go da impastare fango e laorare fin a sera.
La ga da fare el gnaro ai so putini
ne farà tri o quatro,
i sarà dei bei rondinini.
I ga fame,
la boca verta fora dal so letino,
un volo,
uno strido,
ed eco la mama ancora
e dopo ancora on bel vermino.
Adeso a nanna, mama rondine stanca
cocola i suoi rondinini.
Me pare de vedare
tute le mame del mondo
quando e basa e le strinze i so putini.*

LUCA VEGRO
Classe III Scuola Elementare
Anguillara Veneta PD

A TI MAMMA

*Mamma,
la prima volta ca t'ò ciamà,
gero picinina,
non saevo caminare,
e gero sempre drio zigare.
Tanti dì a xé pasà,
tante volte a te gò ciamà:
diese, venti volte al dì
e ti a te jeri sempre lì.
Adeso ca sò grande me piasaria
dedicarte na poesia:
do paroe a me vien:
a te voito tanto ben!*

OLIVIERI CHIARA
Classe Terza Scuola Elementare
Boara Pisani (PD)

PLUTO

*Vizin a casa mia ghe stà
un cagnoin, se ciama Pluto,
el xé birichin.
El core a volontà el me
varda sempre incantà.
Quando ca vao via coi
patini el se mete baiare,
come par dire: - Cosa voto fare?
Pluto, qualche volta el xé triste,
parchè i so paroni eo asa spesso da solo,
ma quando col me vede el xé felice,
el salta, el baia, el scodinzoa.*

*Insomma caro cagnoin te
si proprio birichin.*

NEGRI MANUEL
Classe Terza Scuola Elementare
Boara Pisani (PD)

AMIGA RONDINE

*Rondine ca te rivi,
rondine ca te parti
resta co' mi,
non voio inprisonarte;
ti ca te si la parona
del ciel e del mare,
e tanti paesi te conosi,
insegname a volare.
Ti, amiga dela primavera,
in tel me cuore te porti la speranza,
te prego no 'ndare via,
sentiria la to mancansa;
so ca però un dì
te volarè par sempre via da mi
e par questo na roba te domando
“In tel cuor portame sempre co' ti.”*

STEFANO PALUGAN
Classe III^a Scuola Elementare
Anguillara Veneta PD

LA RONDINE

*Te te buti, tuta nera,
a brasi verti,
in tel cielo blu dia primavera;
te plani,
te te giri con le schirioltole
e te te diverti,
cara rondinea,
a lasarne tuti quanti
a naso in sù
par amirarte
e par ricordarse
che 'n antro ano xè pasà
e tuti quanti semo ancora qua.*

SILVIA BRAGHIN
*Classe III^a Scuola Elementare
Anguillara Veneta PD*

ON OSEETO

*Ara tò che bel oseeto
che se ferma so chel bacheto.
Me piasaria sararlo in gabia
ma me opà se rabia:
el m' à fato capire
che in gabia el poe morire.
Bianche e more le xè e so piume
e co piove le vola base in tel fiume.
Non le se ferma tanto all' ombria
ma anche dal sole e vola via.
Mi a sò come che el se ciama
parchè meo gà insegnà me mama
el se ciama rondinea
e el xè na bestiola bea bea.
L' è queo che me fa savere
che la primavera xè drio vegnere.*

MICHAEL TRESIN
Classe III^a Scuola Elementare
Anguillara Veneta PD

LA ME SORELLINA

La me sorellina la sé tanto birichina

La sé bea come un fiore.

La sé simpaticissima.

A mi, quando ca vegno casa

da scuola la me fa tanto feste

come un cagnolin.

Allora mi la ciapo in brazo e

me la coccolo,

come che la fuse na bambola

Gloria, a te voio un ben del mondo.

SARA DESTRO

Classe Terza Scuola Elemntare

Boara Pisani

CLASSI QUARTE

LA STELA COMETA

*A go visto tanta sente col naso sù
par vardare qualcosa ca splende in tel ceo blù.*

Cosa sirà?

*I me ga i to: el se on grande evento se rivà
chieta na stea cometa.*

*la go vista mostrare la so longa coa
come on paon quando el fa la roa.*

*Sempre col naso su penso a dumila ani fa
quando la ga portà i Re Maj da Jesù*

Qualche dun me ga ito:

-Atento qualcosa se nasconde drio.

-Cosa ?- mi go domandà

-Peste, fame o guera - me ga ito.

Sarà vero?

*-No, no - mi go risposto - parchè chielà xè robe
che vole la sente.*

*Ea la se fa vedare a tutti noantri, in tutto el
so splendore par farne rifletare soa grandesa de
l'universo*

e dirne de esare tuti fradei e dare amore.

FABIO CAZZADORE
Classe IV Scuola Elementare
Anguillara Veneta PD

ATIMI BELI

*L'ociada
de 'na mama.
su'l putin che zoga.*

*'l primo baso
da a' na putela,
de scondon,
su' na masela
color "bardolin"
mentre
l'arcobaleno'n zielo
te anuncia
la fine de'l temporale:
i xè proprio
atimi beli.*

MICHELA SEGALA
*Classe IV Scuola Elementare
Anguillara Veneta PD*

EL SOE, PITOR

*El soe, pitor
al'orizzonte, tinze la strada ferà.
Passa un treno,
el soe scompare
e riappare subito dopo, con un color novo.
Al tramonto
el soe se spegne.
E, la strada ferà, in t'el scuro dea notte, non se vede.
A inluminarla,
passa un treno,
pien de luci e colori.*

FABIO CIBIN
*Classe Quarta Scuola Elementare
Boara Pisani (PD)*

EL ME CAVAO PEDRO

*El color maron del me cavao Pedro
se confonde col teren bagnà dala piova.
Do oci grandi azuri
come s'el gavesse el mare dentro.
Nitrise quando el sente 'na persona urlare
se abassa quando i putini lo vole cavalcare.
Lo vago a salutare
e lu incomincia a girare atorno.
Po', el se avizina
come s'el volesse dirme:
- dai 'ndemo a fare 'na cavalcada!*

MANUEL SATTIN

*Classe Quarta Scuola Elementare
Boara Pisani (PD)*

A LA FINESTRA

*Xé sera,
so a la finestra
e vardo lontan:
infondo se disegna azuri i coli,
de sora on zielo ch'el gà
del divin:
nuvole d'oro e d'argento fin.
Intanto el canta el vento,
movendo le foie del me rosaro
e mi me perdo
tra el rosa dei petai
e el profumo dei fiori.*

SILVIA TIBERTO

*Classe Quarta Scuola Elementare
Boara Pisani (PD)*

VARCANDO L'ARZARE DE L'ADASE

*A xé matina presto,
el sguazo el ga pena finio
de fare el so laoro:
viole, supete, angioeti;
tuti luzenti soto el sole.
So l'arzere de l'Adese,
i osei canta sui rami dei salisi,
coi oci li zerco in mezo ae foie,
ma no i vol farse mirare.
Do gabiani in volo, intanto,
i sfoga lo so libertà...*

MARCO PASQUALIN
*Classe Quarta Scuola Elementare
Boara Pisani (PD)*

ACQUA

*Na 'olta
te geri acqua ciara
ma deso non pì.
Na 'olta
tuti i vegnea
a farte compagnia
ma deso non pì.
Na 'olta
te sentii vosi
che disea:
-Dai tufate anche ti!-
Ma deso
ste vosi non
tee senti pì.
Acqua, deso
te si onta
e nesuno vien pì
a farte compagnia.*

ARIANNA BARISON
*Classe Quarta Scuola Elementare
Anguillara Veneta (PD)*

LA ME AMIGA

*La me amiga ea xè speciae.
Quando a vago a scuola
ea la me saluda cussì:
-Gheto studià,
te sè che a maestra onquò
la ne interroga.
Mi rispondo de sì.
Ma ghe xè na roba che me piase
de ea:
la so incredibile fantasia,
ea me fà sognare
ea me dà nove idee
la me incoraia quando che so
in difficoltà
insoma la me meio amiga Irene
no'a cambiaria con nesuna
putina del mondo.*

PAMELA ANDREOLI
Classe *Quarta Scuola Elementare*
Anguillara Veneta (PD)

DOVE SITO FIUME?

*Te ieri superbo e prepotente
scuro e rombante
a te voevi a tuti i costi usire,
el to leto nol te bastava
e tuto te gavaresi voesto travolgere.
Ora ti si mesto quasi indifeso
te - te vergogni de esere diventà
picolo picolo.
La natura e a cambia.
La natura e a xe strana.
La natura e a xe grande.*

IRENE AZZOLINI
Classe Quarta Scuola Elementare
Anguillara Veneta (PD)

ON SORISO

*On soriso nol dura che on fià,
ma el xe importante,
parchè el soriso profondo de na persona
el xe cofà na carena de amore
verso el to cuore.*

*Però ve gò da dire che ghe ne basta uno
par far contento qualche d'un.*

*El soriso el xe el segno
de n'amicizia speciae,
chel comisia in tel bisogno
e nol finise mai.*

MARZIA GAUDENZI
Classe Quarta Scuola Elementare
Anguillara Veneta (PD)

EL GHEPARDO

*Veoce feino,
ocio schivo.
Quando te curi
i to arti i xe
quasi invisibii,
e e to sate
e pare roe
de sora ae rotaie
chie core ad alta
veocità.
Ti te si el meio
ti te si el solo, che
te vivi in te on mondo fantastico
ma vero.*

TALPO MATTIA
*Classe Quarta Scuola Elementare
Anguillara Veneta (PD)*

LA ME VIA

*Solo na strada ghe xe in ti a me via!
Con el soe e con ea piova
ogni dì ea me pare nova.
Picoea strada campagna
che ogni matina te me porti a scoa.
Strada,
con in parte el verde appena nato
qui sasi lustrà
e ea pasaia longo i burdi.
Lo so
solo na strada ghe xe
ma la se tuta par mi.*

DEGAN GIADA
*Classe Quarta Scuola Elementare
Anguillara Veneta (PD)*

EL PAESE MISTERIOSO

*Sol mare chieto
se specia
alberi viridi.
El cieo ciaro
nuvoete lesiere e vardo
sti strani esseri so ea tera.
Xè li che voria
stare par sempre.*

DENIS BANZATO
*Classe Quarta Scuola Elementare
Anguillara Veneta (PD)*

L'AMICISIA

*L'amicisia la xe on
beisimo
segno de amore;
co l'odio non
la se poe gnanca sfiorare.*

*Meraviglioso
e stupendo
el xe sto sentimento
che nol costa gnente
ma.....feicità
e serenità el poe donare.*

*In te on istante
ea xe poe creare
ma solo se ti te voi
te poi desfare.*

VALENTINA DALÒ
*Classe Quarta Scuola Elementare
Anguillara Veneta (PD)*

CLASSI QUINTE

“TRAMONTO”

*Xé le sete dela sera,
vien zo el tramonto.
El zielo se infoga
de rosso e de rosa.
Sento el treno fiscciare,
me giro e, distante,
in mezo al verde,
come na bisa nera
lo vedo rivare.
On pescadore calmo e chieto
en te la riva de on foseto
el varda, el fisa, el tien
de ocio l'acqua.
E intanto el pensa,
el va co la mente
drio ai so ricordi
quando ch' el iera putin
e vizin a lu, a pescare,
ghe iera sempre so pare.*

CHRISTIAN MILAN
Classe quinta Scuola Elementare
Boara Pisani PD

NA ABAGLIANTE BALÀ DE FOGO

*La xé 'na bala de fogo ardente,
La xé 'na bala de fogo abagliante e zala
La xé 'na bala de fogo che brula nel ceo,
che la ilumina nel caminare
sdaldando el me cuore.
Nel tramonto
el soe el iera spezà da calori infogà
trategnevo el respiro
voevo andarlo a tocàr coe man
A un certo punto
el se avolge in un manteo colorà
scomparendo dedrio ae nere
ombre dei monti.*

LAUARA BRUSCAGIN
Classe Quinta Scuola Elementare
Boara Pisani (PD)

EL CALAR DEL DI'

*Xé sera,
so sentà in te i scaini de casa:
vardo el tramonto.
El sole cala pian pianeto
e pitura de rosa el seren.
Pian pianelo se fa largo
la palida luna
col so leziro ciarore
e i osei i vola
a do a do,
insieme in tel zièlo senza confin.*

CUPPONE STEFANIA
Classe Quinta Scuola Elementare
Boara Pisani

SCUOLA MEDIA

CLASSI PRIME

LA PACIARINA

*On giorno a coreo in cortile coa bici
go visto na bea paciarina
go dito” adeso te paso”
e alora so casca.*

*Me so onto le braghe
e me so bagnà fin sora la testa.*

*Me nona se gà desperà
parchè la me gavea pena lavà.*

*Fermo lì come on pupazo
pareo proprio on paiazo.*

*Inveze che pianzare
me nono el sa meso a ridare.*

CALABRIA MARCO
*Classe Prima Scuola Media
Boara Pisani (PD)*

ME NONO E LE BOCE

*Caro nono te ieri alto bon e beo
come to sorea e to fradeo*

*In tel fero vecio te ghe lavorà
e te ghè tanto fadigà*

*Dei animai te ieri inamorà,
e con ti, i toi tanto ben i xe stà*

*Te piasea stare in compagnia
e bevare vin in alegria*

*A boce, te piasea zugare,
e la vitoria conquistare*

*Ora, ca no te ghe si pì,
me piataria zugare a boce co ti.*

PAPARELLA LAURA
Classe Prima Scuole Medie
Boara Pisani (PD)

LA NONA ME AMIGA

Me nona la xe picenina e magretIna.

*Quando la iera zovane la gà laorà in tei campi
sotto el soe la piova el tron ei lampi*

*Me nona la xe brava, bona
e disponibie co tuta la zente posibie,
ma soprattutto co la fameia dee so do fioe,
che tanto ben ghe voe.*

*Flaminia la xe de nome,
ma anca amiga poso ciamarla parchè co mi la parla.*

*Nea so caseta e nel so orteseo,
la vive serena nel mondo più beo.*

PAPARELLA LAURA
Classe Prima Scuole Medie
Boara Pisani (PD)

CLASSI SECONDE

IL RICEVIMENTO GENERALE

*Co riva el dì fAtidico
de dare informassion
in ogni scola el preside
comanda el visiton.*

*E ora tante femene
e qualche raro pare
de corsa e se precipita
pa'ndarse un fià a
informare.*

*Le donne le se spifara
da fin la gravidansa
le ansie e le so fisime
che spiega l'incostansa.*

*“Co ‘I toso gera tenaro,
cascà dal caregoto,
el ga ciapà na semola
che o ga sveià de boto.*

*L'asilo? El gera un fulmine,
e po' ale lementari
el gheva tuti i sintomi
de un genio senza pari.*

*Ma in questa scola perfida
nessun lo ga capìo:
i professor che giudica
ze lori un poco indrio”.*

*Intanto, spentonandose,
scumissia el dentro e fora:
qualcun ghe sta do atimi
qualcuna sta mes'ora,*

*E le altre intorno critica:
- "Gavemo tute pressa!"
E quella là lo insingana,
e sempre ze la stessa!*

*Qualcuna taca spensare.
qualcuna za se stufia,
e do de bona batola
le taca na baruffa:*

*- "Mi son rivà in anticipo:
me toca prima mi!
- Gh'è gnente da discutere:
la staga ferma li! -*

*- La po'ndar farse frizare:
la ze passà davanti!
- Co a ze rivà, ghe gerimo:
poi dirlo tuti quanti!*

*- No a staga farme ridare;
ghe vole educassion!
- A mi no la pol farmela,
se no ghe do un sc-iafon!"*

*E tute le altre femene
se unisse a questionare,
le urla, le se carica,
le se dise de so mare.*

*Intanto do tre omeni
scomissia ad andar via
che luri la girandola
ormai la ga finia.*

*Qualcun ga quasi e lagreme
qualcun l'è sorridente,
qualcun de tante ciacole
no ga capio un bel gnente.*

*Ma lì, davanti ai stipiti,
el mucio mai non cala
che sempre nove femene
vien lente su dala scala.*

*Qualcuno ga sa pratica
e ghe ne conosse tanti;
qualche altra, stando in ultima,
la dise a quei davanti:*

*“Chi zeo de matematica?
che mi no lo conosso;
e vegner ne l'ora giusta
de giorno mi non posso!”*

*Ghe ze chi sa rispondere.
E tute le altre siore
de qua e de la voltandosi
se dise fra de lore:*

*“Mi son sta ancò quindese,
ma 'l gheva pochi voti;
ancò son disponibile,
voria passarli tuti.*

*- El professor de FISICA
pretende un poco massa:
e quel che dise a scola
e 'l voi che tuti fassa.*

*- Nea coession dei compiti
i fa tante preferense:
a chi non ghè simpatico
i dà sempre insuficense.*

*- In classe col me piccolo
sta qualche delinquente:
el mio l'è tanto timido,
nol pol concluder gnente.*

*- Me fiola la va benissimo,
l'è bona pì del pan;
ga tuti voti splendidi,
ma scarso in italian!"*

*E ognuna, gongolandose
se vanta de so fiola
che se no a rende al massimo
ze colpa della scola.*

*Cussì tute ste femene
le passa la giornata
contente de le ciacole
e dea figura fata,*

*E quel che dopo, in sintesi,
ghe dise i professori
ben presto e o desmentega
e scampa for dai pori.*

CLASSE IIª C
Vigodarzere (PD)

ME MAMA ISABEA

*Me mama la se ciama Isabea
la se tanto bona, zovane quanto bea.
La se anca on mare de simpatia,
e par questo la vive co tuti in armonia.
La gà on caveio castan e moso
ma in bicireta ala matina i sola via a pì no poso.
I so oci i se picenini
e i pare do brilantini.
De corporatura la se ben mesa
e la pare na principesa.
El so caratere l'è tuto sprint
basta vedarla co la se mete el giubin.
La gà meso al mondo do putini
che i se tanto birichini.
Qualche olta la fao irabiare
e ea la se mete a sberegare.
Mi ca no so bona a stare irabià
vao fare pace co ea dopo on fià.
Me mama la fà de tuto par contentarme
e la riscia par fin de viziarme.
A me mama ghe piase anca i fiuri
e se qualche d'un se azarda a romparli par eo sarà
duluri.
La acudise e so piantine
come se le fuse dele putine.
Me mama la se perfeta
e in gran parte la se coreta.
Me mama la me da tanto afeto e amore
ch'el ghe vien spontaneo dal so core.
Cara mama te voio far capire
che el me afeto par ti noi podarà mai finire!
Mama auguri!*

ILARIA BONIOLO
Scuola Media
Boara Pisani (PD)

ME NONO RODOLFO

*Me nono, de nome Rodolfo
el portava sempre on capeo color del zolfo.*

*El gera on omo alto e masicio
el se sveiava de bonora
al canto del galo.*

*I so oci limpidi e meravigliosi
i gera del color del celo.*

*El gera propio on bon omo.
el parlava el diaeto veneto.*

*El gavea on cortile pien de faraone,
gaine, cani multe, tori e parfin i musì.
Mai na volta li gà trascurà,
ma sempre con amore li gà curà.*

*Andava in tei campi col trattore
e fasea qualsiasi laoro a tute le ore.*

*Pecà che on omo cusì,
al mondo nol ghe sia pì.*

*El gera solo on omo da amirare,
sempre col sorriso e na parola de conforto.*

*Nono, on cuo non te ghe si
in sta festa
che te voio dedicare,
ma te sento lo steso presente,
parche in tel me cuore
non te sare mai asente.*

MIAZZI RICCARDO
Scuola Media
Boara Pisani (PD)

ME NONA EENA

*Me nona se ciama Eena
e de cognome fa Clemente.*

*La ga na casa picon picon la pare na casa da bamboe,
ogni roba le al so posto, co na madonina
che ea prega sera e matina.*

*Non la xe tanto picinina
ma la xe tanto carina.*

*Ogni dì la va daa Natina
par savere notizie dea matina.*

*De mestiere fa la sarta,
braghe, camise e cotoe la ma cusio
e mi con chea roba me so vestio.*

*Mi ghe voio ben tanto,
e quando so co ea,
me sento n'incanto.
Epure na olta sa rabià tanto:
la me disea "non starghe andare in tel orto"
e mi ghen dasevo a pì non poso.*

*La xe sempre da soa, povera nona,
proprio ea che a saria de compagnia
Ma fra poco xe nadae
e con me nona a casa mia
saremo tuti in compagnia.*

*Non voio pì farla rabiare,
ma se dovesse capitare,
in cambio on mondo de ben
ghe voio dare.*

DANIELA CHIGGIO
Scuola Media - Boara Pisani

ME NONO CONTADIN

*Me nono el xe de nome Bruno,
ma tuti i lo ciama Moro, par la so pele scura.*

*El ga do oci maron
ed el xe on bel fuston.*

*Ghe piase fare el contadin
e curare el so bel giardin*

*Badia e zapa in man sempre
el gà e laora la tera come on disperà.*

*El xe sempre drio segare,
ma nol perde mai de magnare.*

*Ogni tanto, na partia a carte mi e lu femo,
e on mondo se godemo.*

*Ghe sta on periodo chel me ga cunà,
a parlare e a caminare el me gà insegnà
e mai el me ga trascurà.*

*In te sto periodo invernale,
el xe tuto indafarà par le feste de nadae,
el ga za spolvarà el presepe e l'albero con le so bae;*

*e par so neodi poco mae,
se non el ga preparà
na bea mancia....
con tuti sti discorsi de austerità!*

RIZZATO ALBERTO
*Scuola Media
Boara Pisani*

LA ME CARA NONA UMBERTA

*La me nona la se ciama Umberta
la gà àù na infanzia difizie e la dovea stare all'erta
La ama tanto e/ so giardin,
e quando che e/ ghe domanda acqua
la lo s-cianza e lo fa de matin.
La so casa la sè sta impinà da un mucio de piantine
e se ne more pì de qualche d'una dispiasù la dise:
"Puarine le me putine".
La cusina la sè la so pasion
tanto che la ne fa piati prelibà con precision.
Non la sè tanto picenina,
ma la sè on fià ciciottina.
I so oceti a mandoina
i gà la pupila azurina.
I so cavei sempre neti e ordinà
col vento, i se gà on fià spetenà.
El soo l'è on bel caraterin,
ma le on mucio geosin dea so casa e del so giardin.
La sè un tipeto anca carin,
ma quando la se rabia la diventa on pevarin.
Non la parla mai de le facende altrui,
e la se fà sempre i fati sui.
La me nona la sè on mucio bona,
ma come tuti a volte la trona.
Cara nona te voio dire col core:
"Te sarà sempre la migliore!".
Nona, te voio on ben infinio.*

ILARIA BONIOLO
Classe Prima Scuola Media
Boara Pisani

ADULTI

L'ETA' DEL TENPO CHIETO

*Quanto corare drio a la vita!
Desso, finalmente, par brasseto la tegnemo
e co ela come imeghe caminemo
ne la stajon del tenpo chieto.
Drento la storia che se ingropa
fiaremo rochei desfai
zugando co'l siensio petà su i nostri di.
Ne speta de dirito
sta fregola de pase,
co creansa la rancuremo
come perla assà da l'onda
che boca de vento va basar.
Squasi putèi ne fa sto tenpo
e ficando le man in scarsèa
catemo senpre on rosegoto
de biscoto o caramea
che speta de essere ciucià.
Rumega la mente
ne chel dolse che consola
roersando i nostri ani
sora la pria de on fogolaro:
serve, infati, on fià de ciaro
par scoèrsare sgnarae*

*de robe ormai desmentegae.
Ne piase, ne fa ben
sentire vossi rochetare
inpissarse pian pianin
e 'ncora incipriarse
co la polvare de le strade,
cocolarse sora el mus-cio de la note
paciolando soi soeti co barbastreji e racoete,
e po' co la luna, butarse so'l cussin
petenando i so caveji co le man de tosatèi.*

*Sta aria che inbàuca
porta on'Ave de canpana
assande sora la sera
on fio de teneressa
'ndove na stirola de anime speta de migrar...*

ROSANNA PEROZZO
Caselle di Selvazzano (PD)

'NA VITA DRENTO ON GOTO

*In fondo al canpo colgà drio na piantà,
rente la vanga
e a 'na botiglia piena,
l'è drio pensare
el vecio solo.
Pianeto, 'na man
alsa on goto de vin
zalo come el respiro del soe
e lu ghe vede drento
come in te on specio,
in te on momento solo
tuta la so vita:
Le massele dea prima morosa
rosse e de veludo.
L'abito bianco dela so sposa,
i oci celesti
del so primo toseto
e i so vintani forti
co tante nove speranse.
E 'po,
giosse de suore,
canti de alegria;
caldo, neve,
piova, tenpesta ,
tuto se smissia
drento a chel goto,
come na folà de foje
tormentà dal vento,
El pianze a oci bassi
el vecio solo.
Presto, vegnarà l'inverno
-el pensa -
a portarme via
l'ultima brancà de foje.
Eco: na sboconà de vin
e on sbianso de soe,
sugarà l'ultima lagrema
che sluse tremando
in te i so oci.*

GEMA BELLOTTO
Cortelà di Vo (PD)

OTOBRE OVERO CREPUSCOLO GRAGNANATO

*Na s-ceta telarina de fumara
dolze e liziera come el me respiro
la braza tuto coanto l'orizzonte...
da brava mama carezando
la campagna 'verta
e verde come la me speranza
incapunìa a no lassarme pì.*

*Dai fràssani e da'e piope
sto autuno el sfuma
la presunzion de'e zime...
e i rami senza orgòlio
eco chi i sbassa fin scoasi in tera
i so ornamenti on fià cunfusi
e zà carghi de sira.*

*Tuti i uduri i se desfa
e i sparisce inte sta aria
che 'a se desméntega del bon calore
c'a ghe jera prima:
prima che 'a Natura straca
la se 'rendesse al tempo pressiarolo
intanto ch'el soe el completava
la so sòlita prucission.*

*On atimo de incendio - frégole de fuogo
sùbito desmorzà da'a fumara*

*in cuntinuo spissimento...
e la me ànema mòja e stranià
al par de chel sàlese nudo
bronbo de fredo e de paura
ch'el me fìfota arente
sgrafegnando on zièò senpre pì scuro
senpre pì guodo
la se coàcia de malincunia
fin che 'a smarisse i oci inzerti
so on panorama inbarbajà
ch'el promete unicamente
la pì greva desolazion...*

MILAN ELVIDIO
Grignano Polesine (RO)

QUANDO A SCOLA

*Quando a scòla la Maestra
la ne spiegava la vita
drénto i òci putìni
vidivino i nostri doman del tempo
cofà lanpi de sole in festa
e ùrli de trionfì sicuri
e no' capivino e biastème de'a jénte
contro tuto el mondo intiero.
Si zòvani voàltri - i ne diséa -
par capire la difarenza, tra
e paròe dite e la verità scònta.
Xe rivà anca par noàltri
el tempo de capire, el tempo
de çércarse, scunti che sémo
drénto i brazzi de'a indifarenza
che giorno dopo giorno
la ne scancéa i sogni corsari.
Mi voria ancora 'tòrnare a scòla
a scoltàre e paròe de'a Maestra
par desmentégare
la paura che me spia el cuore.
Inutìe çércare i ricordi
drénto e ònbre d'i rinpianti
o scapàre cofà fussimo òrbi
dal circolo d'i pensieri
mèjo xe se se férmemo
tel ridare nètto d'on putìn
sperando, chel fio
del'amore par la vita
el liga co'a felicità d'i senplici
i nostri credi, lassà co' l'infanzia
su'i banchi de'a scòla.*

LUCIANO BONVENTO
Rovigo

EL CACARO

*Sta drento al ponaro tuto 'l polame,
e inte 'a corte, ghe xe solo fojame.
Le sta dormendo le rane inte 'l fosso
cofà la caena inbiancà dechel posso.*

*Anca 'a passaja, tuto in un momento
pare che la sia diventà de argento;
e co' supia sto rognoso ventesèò
no se sente siolare gnanca un osèò.*

*Desso 'l sole se ga fato foresto,
e dopo çena, se va a leto presto.
Ma quando là fora pare tuto morto,
Lu, 'l fa 'na bèa figura in mezo a l'orto*

*co i so fruti dechel bel arancion,
prima che 'l giasso co te so coression
no i rovina co de i spegassi neri
come de 'e volte, xe i nostri pensieri!!!*

LUCIANO SALMISTRARO
Albignasego (PD)

DRENTO LA SERA

*Pareciava el sole ne la sera lanpra
el so solito cuceto:
la so luse 'I rapossava
destirando drivovia i colori de la jornada.*

*Mi, pì in basso, lo vardavo,
lu, par caso 'l s'incorseva
che brassavo chel momento
e ... "stela de bon core"
al me vardar el regalava
'na sbrancà de chei pastei.*

*Contadina de la sera,
indemavo el zalo e 'ncora el zalo,
lo metevo tutoquanto
drento i sésti de la stajon,
pa' inpiturare i dè inturbiaì
de i petabrose, de 'l girasole.*

*Giossa de nuvoleta,
me insupavo de blu, de viola,
me desgropavo in chel mistero
versendome a la caressa
de 'na sbiuma tuta d'oro,
al fiatar de on incanto
che solo l'ànema sa dir.*

*Vestia de chea belessa
patocavo pian pianeto on'orassion
ringrassiano "qualcheduno" ...
e intanto, el rosso
'ndava drento fisso fisso al so color
desmissiando on gran ciasso.*

*Sensa tanto pensar sora, doparavo l'ocasion
e co le man de 'l me pensiero
rancuravo chel color
come vin de luse eterna.
Lo metevo dapartuto,
in tuti i posti che catavo
e po: lo lassavo sgiossolar ne i mile, mile goti
par inbriagar de la vita
chel silensio immusonà
che ghe stropa cor e oci.*

ROSANNA PEROZZO
Caselle di Selvazzano (PD)

LA MAN DEA ME PRIMA MAESTRA

Calda

*come la man de na mama,
bianca
e inprofumà de inchiostro
la se posava pian
sora la mia
come na farfala
sora on fiore.*

Sicura

*la guidava la me pena
quando, inpauria
la se inpuntava
sbusando el fojo
e schincando anca el penin.
E al so calore
sparìa, ogni paura.*

Cara, la me prima maestra!

*Te si ancora co mi
drento al me core.*

La to man calda

*so la mia
posà so le tonde silabe
che go inparà
par prime:
“M” come mama,
come maestra,
e “A” come amore.*

GEMMA BELLOTTO
Cortelà di Vo (PD)

LA SOITUDINE DE UN ANSIAN

*Chi che no a prova
no poe savere cossa che a sia.
Se zè vodi dentro
e no entra gnente
nel nostro cuor,
se pensa de morire
par concludere tutto
e no darghe peso a nessuni;
no te si più necessario,
come na cosa messa da parte
e far comodo quando che ocore.
La personaità che te gavevi
co te geri zovene dove zea?
I sacrifici che te ghe fato
te gai compensà, credo de no.
Dee volte ghe voe tanto poco
par colmare sta pora vita de ansiani soi:
na gentiessa, na paroea cara.
I zoveni no gà più tempo
par ste cose.
Cussì passa sti pochi ani che te resta
fin che a vita no se smorsa
come na candea quando che a zè finia.*

PIN CRISTINA
Piazzola sul Brenta (PD)

INSIEME

*Dixeva sti ani
i veci befani
ai fioi che creseva
e le done i vardava:
Sta tento, stea mia,
la dona xé stria!*

*El fiolo taseva
e intanto el pensava:
Caro el me pare, contala giusta:
sensa me mare te sù xo de susta!*

*Ma senti sti semi, amighe mie:
ne credile mone o inseminè
che i se onora de tegnerne tacà
tanto parchè ghe femo pecà?*

*La vita gà istesso tanti dolori,
in dò se camina più forti e sicuri.
Finimola de darse bote e spintoni:
el destin de tuti, le done e i omeni,
xé quello de stare tacà par man,
par no cascare né oncò né doman.*

STEFANIA TEMOLO GARBO
Mestrino (PD)

EL TEMPORAE

*Fin da toseta
gò vudo sempre
paura del temporae.
El me pareva un mostro
che voesse sofegarme.
Co gaveva me mama,
me scondeva soto a sò traversa
e gera la me salvessa.
Adesso no gò più nessuno
cussì me dago coraio
caminando de qua e de là
fin che tuto sia passà.
Quando che se vede
ste nuvoe more, sgionfe de acqua
che se avisina, coi lampi e saete,
che sciochi che se sente!
Coe man me sarò e recie
par non sentire gnente,
pensando sempre a me mama
che a gavarà ancora a so traversa
anca al mondo de à,
e me salvarà da stà paura
che gò dosso fin daea tenara età.*

PIN CRISTINA
Piazzola sul Brenta (PD)

EL BACAN

*Quando ca vedo el cielo seren
o pien de stele
non sento più che le quatro rode
ca impesta el mondo
allora a penso ale strade de polvare
e ai fosi piene de rane che le cantava ala luna
Dove sito restà mondo neto e poareto,
pien de speranze e ilusion?
Solo dentro i sogni de na donna, vecia de cuore
e de spirito ...
Adesso el bacan l'è finio,
ma non se pol più pensar,
non se pol più tornare indrio ...*

VANNA RIBETO
Padova

XE SERA

Xe séra

*la voze ciassosa dei zogadòri de bocce
inpiena l'aria 'ncora tiepida de agosto
e torno i lampioni del prete*

*'e farfae noturne,
creature incossienti,
'e ghe sbate in coste
come inebetìe.*

*Pa 'e case i balconi resta verti
e la zente va in piassa.*

*Staséra ghe so anca mi
ma tuto sto fermento
el me assa indifarente
parchè sò che no xe qua
che vedarò el to bel viso
che tanto me xe caro.*

SUSANNA VOLTIN
Conselve (PD)

LA CITA' DI EROI

*Rovigo (almanco quela del passato)
la ghea on senso eroico ináto!
A ghe piasea i re, i conquistatori,
i esploratori e i condotieri,
e i adorava tuta sta bravura
anca dopo la sepoltura.*

*I fasea monumenti, i tacava targhe,
... quà xe nato el tal di tali
el gera el meio di mortali...
Sto sentimento de vanità
anca onquò el ghe xe restà.*

*Varda on fià al cimitero,
te pare a ti ca sia tuto vero?
Tutì boni, tuta bravi, tuti santi,
tuti onesti, proprio tuti quanti.
Quà, da vivi, i se senti tuti leoni,
i parla e sparla e i fa i sbraghessoni.
Pò, da morti, pezo ancora:
se de qualcun te parli male
(parché da vivo el t'à imbroià)
a te te cati cuerelà...*

*Atento,
forestiero,
entrando in cità
varda ben quel ca te fa!
Par cauzione,
a voria metarghe na targa a Boara
se qualche persona xe ignara....*

*“Forestiero!
Tu entri in una cità vanitosa
Cerca di far bene ogni cosa!
Quà tuti i vol fare bona figura
anca dopo la sepoltura!*

E. DIONISIO
Rovigo

CONCORSO “ PREMIO LIVIO FERRARI - IN DIAETO VENETO 1997”

ELENCO DEI PREMIATI *POESIA*

Categoria A: I e II Scuola Elementare (a.s. 1996/97)

Classe prima classificata:

Prima classe sc. elem. Boara Pisani PD

Classe seconda classificata:

Prima classe sc. elem. Boara Pisani PD

Classe terza classificata: Seconda classe sc. elem. Anguillara Veneta PD

Categoria B: III, IV e V Scuola Elementare (a.s. 1996/97)

Classe prima classificata:

Quarta classe sc. elem. Anguillara Veneta PD

Classe seconda classificata:

Terza classe sc. elem. Anguillara Veneta PD

Classe terza classificata:

Quinta sc. elem. Boara Pisani PD

Categoria C: I, II e III Scuola Media (a.s. 1996/97)

Prima classificata:

Classe Seconda C Scuola Media Vigodarzere PD

Secondo classificato:

Boniolo Ilaria con “Me mama Isabea”

Classe 1ª Scuola Media Boara Pisani PD

Terzo classificato:

Miazzi Riccardo con "Me nono Rodolfo"

Classe 1ª Scuola Media Boara Pisani PD

Categoria D: Adulti:

Primo classificato:

ROSANNA PEROZZO - CASELLE DI SELVAZZANO

con *L'ETA' DEL TEMPO CHIETO*

Secondo classificato:

GEMMA BELLOTTO - CORTELA DI VO (PD)

con *NA VITA DRENTA ON GOTO*

Terzo classificato:

MILAN ELVIDIO - GRIGNANO (RO)

con *OTOBRE OVERO CREPUSCOLO GREGNANATO*

Quarto classificato:

BONVENTO LUCIANO - ROVIGO

con *"QUANDO A SCOLA"*

Quinto classificato:

SALMISTRARO LUCIANO - ALBIGNASEGO (PD)

con *EL CACARO*

la Commissione Giudicatrice
Carla Cavallaro, Rosetta Menarello,
Lodovica Mutterle,
Nivella Paronetto e Carla Tenuta

Boara Pisani, 7 Settembre 1997

*finito di stampare
nel settembre 1997
presso*

arti grafiche stanghella
via canaletta inferiore, 84
35048 stanghella pd
tel. e fax: 0425/95018

